



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 8

Trump tepsettsü merangba indang tai tongloktsüba Iran-i aitsür

Rafael Nadal US Open entry list nung züngoksema lir

VOL. XXI ISSUE NO. 275 (ADOK 275) DIMAPUR YANGTEPNÜ (THURSDAY) CHITENI (JULY) 18, 2024 ₹ 5.00

Lok Sabha MP-i Rengma lennirtem den ajurutep

Dimapur, July 17, 2024 (TYO): Congress Lok Sabha MP S. Spongmeren Jamir-i Bodbarñü Tseminyu nung Rengma Hoho lennirtem den ajurutepa senden ka menogo.

Iba sentong nung o jembidang Spongmeren-i Rengma nunger dang pa 18 buba Lok Sabha nung züngsemtsüsa takok ngudaktsüba atema pelaba metetdaktüsü.

"Tsüngrem teyari maden asübo ni iba takok mengula" ta paisa ashi.

Takok ngudaktsüba den külemi tebilemtsü khuret aika aliba angateta lir anungji Naga nunger maitsü aser libaliro wazüka aser kümzüka ayutsü atema akokba tashi inyaktüsü ta Spongmeren-isa nangzük.

"Nagaland nung Opposition

maliba sorkar nung takoksa aika keta lir. Tanü Nagaland nung MLA temi opposition bench nung memennüba atema temulung shiranger. Iba ya Nagaland nung alirtem asoshi lendong ka lir aser democracy mali kümdaktsüba inyakyim ka lir" ta pai ashi.

Congress party-i Nagaland nung level ajak nung Development Monitoring Committees tentettsü bangjemtepogo. Iba ajanga Nagaland renloktsü atema Central funds amshiba metettsü aser jangjatsü, ta MP Spongmeren-isa ashi.

Paisa July 15 nü Chakhesang Public Organisation (CPO) aser July 16 nü Western Sümi Hoho lennirtem den ajurutepa sendentem menogo.

BJP-NDPP tesentaktep akangkanga lir: Imna Along

Dimapur, July 17, 2024 (TYO): Nagaland nung taküm June ita Urban Local Bodies (ULBs) elections agiba mapang NDPP aser BJP tsünga mangatettep adoka lir ama jembia arur saka BJP lennir aser Minister Temjen Imna Along-ibo People's Democratic Alliance (PDA) akangkanga lir ta shiogo.

Dimapur nung Bharatiya Janata Party (BJP) state executive senden nung osangbener den jembidang "PDA nung yaritepa telok ana- Nationalist Democratic Progressive Party (NDPP) aser BJP tsünga tesentaktep akangkanga lir" ta Imna Along-isa ashi.

"Ajak junga dang lir aser PDA teloktep tashi itta lir" ta pai ashi.

Dimapur Municipal Council (DMC) nung BJP councilor temi tawa tu NDPP inyaksangshi

atema tebilemtsü khuret abenba lemsatepa liasü. ULBs election nung ward aika nung BJP aser NDPP külemi toktepa atema parnoki iba osang lemsatep.

NDPP-i BJP nungi takok anguba councilors den asüngdangya mesüi chairperson aser deputy chairperson shim aser iba ajanga BJP-i nübo shidangsü maangka mangu ta BJP councilor temisa ashi.

Iba atema Minister Imna Along-isa ashi "BJP-i PDA teloktep tangatetba nung petition ka agütsüogo aser iba nung ULB election nung takok anguba BJP councilors nem mapa lezmüksütsü mepishia lir."

"Iba asoshi mapang agitsü kechiyong onok tsünga maneni olemteptsü. Ozü central leaders Nagaland nung arua lir" ta Along-isa ashi.

NH-29, Airport Junction anasa lenmang yangshilutsü

Dimapur, July 17, 2024 (TYO): Dimapur kübok NH-29, Airport Junction (Near City Tyre Service), 3rd Mile nung lenmang anenoka aiba yanglushitsü osang metetdaktüsügo.

July 18 nungi 25, 2024 tashi 114-100 Km RHS (Right hand side) nung mapa inyaktüsü anungji iba mapang airport junction anasa NH-29 nung ali anenoka aiba tesem ajunga shibangtsü ta

Commissioner of Police, Dimapur-i sangdong ka nung ashi.

Iba mapang Dimapur tsütsü aoba gari ajak airport junction nungi single lane nung dang senzüdaktsütsü. Anungji lenmang yanglushiba anasa garitem overtake/ park/ stop masütsü metetdaktüsü, ta Commissioner of Police-i ashi.

Northeast nung tzunglu kanga arutsü

Dimapur, July 17, 2024 (TYO): India Meteorological Department (IMD)-i Nagaland, Manipur, Mizoram aser Tripura nung taruba anogo pezü tashi tzunglu kanga arutsü metetdaktüsügo.

Nagaland state yimtiba Kohima nung tesüiba ghonda 24 tsünga maximum temperature 27.6 Degree Celsius aser Minimum 18.2 Degree Celsius liasü.

NSF-i Nagaland sorkar nem tenüngsang agütsür

Dimapur, July 17, 2024 (TYO): December 2021 nung Oting nung nisungtem teptsetba Indian Army personnel anema ken o benoka angadangsü atema Nagaland sorkari Supreme Court nung writ petition benokba tenüngsang agütsür ta Naga Students' Federation (NSF)-i ashi.

State sorkari tasütait mapa inyakba ajanga Nagaland-i meimchir temeten anema inyakterem ozüng tapet agi merenshiba aser aitsüba sayur ta NSF-i ashi.

"Oting nung tai maketba nisung 13 tepsetba ajanga Naga nunger ajak aoksadaktsü. State sorkari tentetba Special Investigation Team (SIT)-i kanga junga bushisüngdangdang aibelener army personnel jangaago saka Centre-i parnok anema ken o benoktsü memulungba ya temeten maparen nung tetsükdaktsü tulu ka lir" NSF-isa ashi.

"Iba atema Supreme Court-i Union Ministry of Defence aser

Ministry of Home Affairs dangi sangdong yokba ya mapa tajung ka lir. State sorkari writ petition benokba nung NSF-ia pusema nungiter. Naga People's Movement for Human Rights (NPMHR) v. Union of India ateam oshidang agütsüba nung prosecution sanction magütsüba shia lir anungji Oting ken o meyipa repringshitsüla" ta NSF President Medovi Rhi aser Assistant General Secretary Kenilo Kent nati sangdong ka nung ashi.

"Naga lima nungi Armed Forces (Special Powers) Act (AFSPA) agientsü maneni nenshir kechiyong Oting lendong ajanga AFSPA nung tetsükdaktsü alibatem sayuogo. AFSPA kübok law & order inyaker ta ser meimchir temeten alema tashiyim mapa inyaker. Anungji India sorkar dang AFSPA agientsü akhangba agizütsü aser Naga lima nungi iba ozüng agientsü ayongzük" ta NSF-isa metetdaktüsü.

"Naga lima nungi AFSPA magien tashi NSF-i armed forces den amalitep kecha malitsü. NSF kübok federating units aser subordinate bodies ajaki non-cooperation tetuyuba sülen anidaktsü nenshir" ta parnokisa ashi.

"Oting lendong nung taküm samaba kibong ajak den asükuh lemsateper aser onoki iba tatalokba atema temeten bushiba manentsü nenshia metetdaktüsü. NSF-i iba ken o asoshi maparen inyaka aoba nung tenük yoktsü aser civil society organizations den külemi temeten mangu tashi inyaktüsü" ta NSF-isa metetdaktüsü.

Parnokisa Nagaland state sorkar dang Oting nung tasürtem asoshi bendanga agüja temeten bushitsüba atema tenüngsang agütsüba metetdaktüsügo.

NSF-isa Naga sensotem aser civil society organizations ajak longjemer state sorkari iba ken o atema inyakba pusema nungittsü mepishia metetdaktüsügo.

Centre-i Nagaland asoshi khuret talila bentsür aru: MP Spongmeren

Dimapur, July 17, 2024 (TYO): India sorkari Nagaland nung ken o ana atema metetsümonga khuret bentsür arur atema Lok Sabha MP Spongmeren Jamir-i ashi.

Indo-Naga yimten ken o aser ENPO-i Frontier Nagaland Territory akhangba ken o atema Centre-i khuret talila agütsür ta pai ashi.

Spongmeren-isa pa Lok Sabha election nung takok anguba ya asenok ajak atema sayatonya ka lir aser Nagaland nung alirtemi inyaksangshi, sobaliba, tamangba yimsütem aser talisa nübo agi tangar memenepba kintem kümzüka ayutsü atema secular party ka nem takok ngudaktsü ta ashi.

"Tang asenok kati ka yaritepa inyaka aotsüla. Onoki nübertem tsüngdang nangzükba ama onoki inyaktüsüla. Onoki nübor nem temeten agütsütsü. Temeten agütsüba ajanga Nagaland nung yimtenren tensa melenshütsü" ta MP Spongmeren-i ashi.

Mongulbarnü Naga Council Dimapur züngsemtem den jembidang "India sorkari tasa atonga khurettem bentsür aruba koktettsü asoshi joko asenok ajak külemi shilem agitsüsa kümogo" ta pai ashi.

"Centre-i Naga yimtenren teloktem den tenangzükba ana- 'Framework Agreement' aser 'Agreed Position' agiogo. Tenangzükba ka küm 9 aser ka



Supongmeren Jamir (file)

asüngdangtsü" ta Spongmeren-isa metetdaktüsü.

"Nenoki asen adianutem (NPGs) dangi oang aser parnok dang tenangzüktep yangluba sülen kechiba küm 9 tashi atar? Kechiba küm 7 tashi atar? ta asüngdangang.

NCD züngsemtemi Naga yimtenren teloktem den ajuruteptsüla aser Indo-Naga khuret koktettsü atema lenmangtem bushitepa yariteptsüla" ta paisa ayongzük.

"Item agreements liaka nisungtem khaseter aser Ceasefire Monitoring Cell-ia teinyaktüsü meinyaker" ta paisa ashi.

"Shishilembartemi Dimapur nungi Assam kübok Khatkhati-i shishilembaba belener kechiyong parnok idakji lending nungi kümzüka alitsü ama bilemer. Shishilembar kati Nagaland toktsür aobaji asenok atema takoksa ulura lir" ta Lok Sabha MP Spongmeren-isa ashi.

"Tang aliba Nagaland sorkar nungi ketdangsubaren tajung meimlar saka asenoki sorkar nem shitak inyaktüsütsü atema ola adokdi aser shisatsü agütsüdi. Asenok ajak külemi meinyakra khurettem mekoktettsü" ta paisa NCD züngsemtem ayongzük.

"NCD lennirtemi Naga kin 20 indang tebilemtsü aser khurettem atema dang masü saka Dimapur nung minority communities atemaa inyaktüsüla" ta Spongmeren-isa ashi.

Wb. Marlepeden "Guru" jenjang ajangzüktetba nungtem nung sentong ka agi



Wb. Marlepeden-i pa "Guru" jenjang ajangzüktetba nungtem nung sentong agidang jempiba noksa nung angur.

Mokokchung, July/Chiteni 17 (TYO): Ungma nung Wb. Marlepeden Ministry of Culture, Government of India. Guru Shishya Parampara Scheme, kübok sobaliba kentenmenü, sobaliba kaket züluba aser otsü olem nung Guru jenjang ajangzüktetba nungtem nung sentong ka yashi par kidang Arkong ward nung ayongzüka kaogo.

Iba sentong nung tetushi tejaoker Ao Riju Mokokchung, Publication Head. Wb. I. Temjen Tzüdir-i jembidang Wb. Marlepeden-i sobaliba kentenmenü, sobaliba kaket züluba aser sobaliba otsü olem nung kanga dang temelung agüja inyaka nünburtem ajangzükdaktsüba ngua Ministry of Culture, Government of India. Guru Shishya Parampara Scheme, kübok nungi "Guru" nungja

ajangzüktetba asoshi tenüngsang agüja ashi.

Ao kin rongnungi tang tashi nung Guru jenjang ajangzüktet 6 shi lir, aser parnoki iba Guru ajangzüktetba ajanga nünburtem aika parnok nung tangazükba jenti ngudagi, Ao kin-i iba ya retreta agitsüla kechiaser parnoki Guru ngutetbaji ajanga asen Ao kin sobaliba kentenmenü, sobaliba otsü olem aser oshi-oben nung tejakleni anitettsü asoshi lenmang sadema lapoka aotsüta Temjen Temjen Tzüdir-isa ashi.

Paisa nünburtem talisa Aor lanu asensortem sobaliba tsütsü kenten menu, otsü olem, kaket ken o zülü, aser oshioben ama nung renlokdaktsütsü asoshi Guru Marlepeden-i riju ka lapoka tesayuba agütsütet nungbo Ao kin asoshi kangasa temoatsü asütsüta lemsatetp.

Yimtsüng balala sema asen

sobaliba tajung angazüka jaja iba sülen medemsortem den item ya wazüka aser rizünga ayutsü nungtakerta lemsatetp aser pai talisa Dr. Satemmeren Longkümer aser Guru Awardee Sangyusang Pongen parnok dang nungia aiben dang shisatsü agia aruba aser kaket zülubaren nung Wb. I. Temjen Tzüdir nungi shisatsü agiba Guru Marlepeden-i lemsatetp.

Guru Marlepeden-isa nünburtemi pei sobaliba kenten menu, otsü olem, kaket ken o zülü, aser oshioben tali senpua bushitsüla talisa oshi nung kanga dang temelung agütsütsüla, kechiaser oshi oben samara kin ka samatsüta ashi.

Sentong nungsa Arkong Ward, Chairman Wb. Toshimeren aser Head D o b a s h i, M o k o k c h u n g Imolangba nungeria tenüngsang agüja shilem agia jembia liasü.

Naga Hoho-i Er. S. Ashiho John Maoon asükhulemsatetp

Dimapur, Chiteni/July 17 (TYO): Er. S. Ashiho John Maoon Dimapur nung July 12 nü asüba osang menur angazüka kanga sasar, shiba den tepila sentong Dimapur nung July 13, 2024 nü agia liasü, ta Naga Hoho sangdong ka ajanga ashi.

Pa jangratema liogo aser pa asüba mapang arishi küm 91 tain liasü. Asür Er. S. Ashiho John arishi tepiyong nünburtem tenzüka liasü. Pa Government of Nagaland nung Engineer (PWD) ka ama inyaka aser 1996 küm mapa nungi anisüngzüka

sülen pai Mao kin, South Nagas of Nagaland aser Naga nungertem jenjang balala nung tenzüka liasü, ta Naga Hoho ajanga ashi.

Pai Naga Hogo nunga Regional Secretary ka ama 1998 nungi 2005 tashi inyaka liasü.

Pa arishi tepiyong Naga nung asoshi asadangtsü mokoki tenzüka nünburtemi kodanga mamadoktsü. Mangyimer kibong den asükhulemsatetp aser asür tanüla teti tesunep nung anisüngzükjang ta sarasademtsür, ta sangdong ajangasa ashi.

Jalukie nung 3 buba TAEMs agitsü



Bike Outreach sentong ka tenzüka mapang tangokba noksa nung Deputy Commissioner, Phek, John Tsulise Sangtam, IAS aser ketdangsurtem angur.

Dimapur, Chiteni/July 17 (TYO): Deputy Commissioner, Peren, Vineet Kumar, IAS ajanga sangdong ka nung ashiba agi, Peren District Administration aser Ministry of Tribal Affairs, Government of India kübok TRIFED lungjemer Peren district kübok Jalukie Town nung July 26, 2024 nü Tribal Artisan Empanelment Melas (TAEMs) phase tasembuba agitsü.

Iba mela ya "Marketing and Logistics Development for promotion of tribal products"

scheme kübok agitsü.

Iba dak sendakba nung Block/Tehsils/Yimtsüng balala nungi jangra aliba tribal artisans/producers temi July 23, 2024 tashinung dperen-nga@nic.in dangi application mail asütsüla, ta ashi.

Artisans/producers shimba yimya ya 'first come first basis' nung alitsü. Iba dak sendakba nung tali tejangjaba metetnür temi EAC Jalukie den mobile number 9402912112 ajanga tongteprateptsü akok, ta sangdong ajangasa ashi.

Imchen's Custom Art School Kohima küm ka jungogo



Dimapur, Chiteni/July 17 (TYO): Imchen's Custom Art School Kohima tenzüker küma ka ajungba anogomung July 13. 2024 nü munga liasü.

Kohima Ao Baptist Arogo pastor Rev. Tiatoshi Longkümer-i sarasadema iba sentong ya tenzüker aser iba Art School kibur aser 3D architectural designer Moa Imchen-i kaketshir dang alima 'creativity' indang küm ka jangratema sayua aruba indang

lemsatetpa liasü.

Iba school ya yakta International Animation Production Company nung affiliate asütsü, koba ajanga PUBG, ML, Candy Crush amala games yanglua smart phones mesüra laptops aser PC nung asenoki asayar, ta Imchen-i ashi.

Automobiles, Architectural, Fashion designing, mobile aser pc gaming amala software nung yangluba indang jembidang, item ajak ya pencil ka aser paper ka

amer aibelen aika ajurua tenzüker, ta pai ashi.

Pai kaketshirtem dang extra-curricular activities aser educational studies lirumedema amshitsü metettsüla ta ashi.

Iba sentong nung tongti tesemdanger ya Kohima Municipal Council kübok Ward 15 nungi tawa 2024 ULB election nung shimteta alisang Ketousie Khamo liasü aser pai kaketshirtem dang tatishitsü balala bener arua kaketshirtem

ajungmesoa liasü.

Tanü-asüng nisung ajak pei wadang nung kanga mazüngteper aser tanurtem mobiles aser computer nung mapang tali indoker. Saka tsürabor temi pei tanur iba art school-i yokba ngua temelung nung ajungmesor aser tarutsü nung teimla angur, ta Khamo-i ashi.

Tsürabor temi pei tanur nem agütsütettsüba sempet tulutbaji senti mapang ya lir, ta pai ashi.

Tanurtemi pei tejangraba lemsatetp tsüsa maongka agütsütsüla. Tsürabor temi tanur aika parnok jangraba meinyakdaktsür. Asenoki meimtsüla, mapang agütsütsüla aser tanurtem kechi nung ajung, aji meteta parnok mangdang asangsang kumdaktsütsü merangtsüla, ta Khamo-i ashi.

Imchen's Custom Art School tenzüka anogo nungi tanü tashi terenlok jenti aliba reju ka lir, ta AG chairman Neizokhotuo Belho-ia ashi aser tsürabor aser kaketshirtem tenüng nung iba reju lapoker nem tenüngsang agüja liasü aser akokba lenmang nungbo yariteptsü mulunga lir ta ashi.

Mapang ka tsürabor temi pei tanurtem doctor mesüra engineer kumdaktsünu, saka tangbo iba putuji süyio, ta Belho-i ashi.

Iba kaketshirtem reju yagi asen tanurtem lenmang tajung nung anitettsü, ta ashi. Imchen's Custom Art School indang 1st Foundation Day nungya art competition agia iba sentong tembanga liasü.

Uttar Pradesh nung CM Yogi Adityanath Yogi melentsüa akok



July 17, 2024 nü Lucknow nung Uttar Pradesh Chief Minister, Yogi Adityanath-i state Angh, Anandiben Patel ajurudang tangokba noksa nung angur.

New Delhi, July 17 (Agencies): Tawa Lok Sabha election nung Uttar Pradesh state nung BJP-i menden aika nung tamakok anguba sülen BJP-i voters nem tamang kadaktsütsü atema inyaker.

BJP-i Uttar Pradesh nung Lok Sabha menden 80 prongla nung takok angutsü, ta jembia liasü saka parnoki menden 33 nung dang takok angu. Iba tamakok ajanga party telung nung tamakok asadangba den külemi tongti lenirtem-a kar melentsü atema jembidar.

Tesüiba anogo ana tsüingda BJP nung lenir tain anati party Tir, JP Nadda ajuruba sülen nungi olulu tali jembi tenzükogo. UP nung Deputy Chief Minister Maurya-i ghonda 48 tsüingda JP Nadda anaben ajuruogo aser Bodhbarnü UP BJP Tir, Bhupendra Chaudhary-ia Ato kilonser Narendra Modi ajurua party tamakokji pa ajanga lir ta shiogo.

Kobi melii Union Home

Minister Amit Shah-ia Ato kilonser Modi ajuru.

Ano külen Samajwadi Party lenir, Akhilesh Yadav-i, "BJP-i tashi raktepba mapang nung Uttar Pradesh nung yimsüsüba aser ketdangsüba sendoka yutsüdar. BJP-i tanga party tem nung tetsükdaktsü politics asayaba ama tang par party telung nunga inyakdar. Ibayongji tang BJP telung nung mepetmesü lir. BJP nungi nüburtem atema bilemtsür shinga mali," ta ashi.

Yogi Adityanath Chief Minister menden nungi agientsü ta jembibaji kar tebilemba dang asütsüa akok saka party-i tongti lenirtem karbo melentsüa akok.

UP nung tawa Lok Sabha election nung tamakok angurtem densema BJP lenirtem aikati chief minister, Yogi inyakim ashishir aser tawa tamakok anguba kuli rongnung ibajia densema lir ta ashir.

2027 küm state assembly election nung rangloker BJP-i

state BJP Tir menden atema OBC (Other Backward Class) nungi lenir ka shimtsüa akok. Tang state BJP Tir, Chaudhary ya Moradabad nungi Jat lenir ka lir. Jat nungertemi BJP dang mepelaba agi parnok melung südaktsütsü atema 2022 küm party-i Chaudhary shima liasü.

Tawa Lucknow nung party senden ka nung Chief Minister, Yogi-i, mepetmesü adokdaktsütsü merangertemi joko maongka mangutsü, ta metetdakja liasü.

Ano külen Dy CM, Maurya-i, party organisation ji sorkar dang nungi tuluba, ta jembio. Item oji ajanga Yogi aser Maurya na tsüingda mangatetep adoka alitsüa akok ta olulu jembi tenzük.

Kobi melii UP nung assembly menden 10 atema by election agitsü. Assembly menden 10 nungjagi 9 bo Lok Sabha election nung takok anguba sülen MLA temi anenba ajanga lir.

Takar aser sensakertem tsüingda ongdang tuluba akümer: Congress

New Delhi, Chiteni/July 17 (Agencies): Bodhbarnü Congress party-i Centre sorkar aija, linük nung rongsenketzüng tsütsü takartem aser sensakertem na tsüingda ongdang tuluba dang akümer, ta metetdaktsü.

Congress general secretary in-charge communications, Jairam Ramesh-i X ajanga media report ka lemsatep; iba report nungji takartem aser sensakertem tsüingda kibong nung sen teindokbaji 10 ben agi teimba lir, ta shia lir.

Jairam Ramesh-i, "Congress party-i linük nung takartem aser sensakertem na tsüingda ongdang tuluba-tuluba dang akümba tebilemtsü onük ya maneni metetdakja arur," ta ashi.

Media report nungji ajemdaker Ramesh-i, yimtsüngtem nung kangasa sensakertem nütsüing shilem 5-i ita shia indokba senji 1,373 dang lir, ajisüaka jila-yimtitem nung kanga takartem nütsüing shilem 5-i ita shia indokba senji 20,824 lir, ta metetdaktsü.

"Data tasentibaji ibai lir.

Ajisüaka nai koba data reprangdir reprangaka kuli ajakji ajanga takartem aser sensakertem tsüingda ongdang tuluba dang akümbaji angutsü," ta Ramesh-i Hindi oshi nung X ajanga metetdaktsü.

Pai ashiba agi, 2012 küm nungi 2021 küm tashi nung linük nung adokdaktsüba rongsen shilem 40 dak temabo linük nung nütsüing shilem 1 ket nung lir.

"Ajisüaka linük nung Goods and Services Tax (GST) saru nungi sarutetba shilem 64 bo sensakertem, lower middle class aser middle class purtemi agütsüba lir," ta pai ashi.

"Tesüiba küm ter tsüingda public kiojen aser resources ji company ka mesüra ana dang dang ayoker. Rongsenkettstüing nung kari dang shilem agiba ajanga osettsüset nung jenjang atur ta economist temi ashir," ta paisa metetdaktsü.

Tanübo India nung billionaire nisung 21 ket nung aliba rongsenji India nung crore 70 ket nung aliba rongsen dang nungi teimba kümogo, ta pai metetdaktsü.



Jammu, July 17, 2024: Jammu & Kashmir kübok Doda district nung kiralongrartemi sepaitem amakba tatalokbatem anema Bodhbarnü Jammu nung Rashtriya Bajrang Dal züngsemtemi longkak aitdang tangokba noksa nung angur.

PM CARES for Children scheme kübok application 51% magizük

New Delhi, Chiteni/July 17 (Agencies): PM CARES fund kübok coronavirus wara mapang lajar akümer tanurtem nem teyari agütsütsü atema PM CARES for Children scheme lir, ajisüaka iba teyari angutsü atema application agütsür shilem 51 bo magizük, ta ketdangsertem osang ka ajanga metetdaktsü.

Iba teyari atema application agütsür shilem 49-i dang teyari angutsü.

Application teimtiba

agütsüba state asemji Rajasthan, Maharashtra aser Uttar Pradesh state tem liasü. Rajasthan nungi applications agütsür 1,553 liasü, Maharashtra nungi 1,511 aser Uttar Pradesh nungi application 1,007 agüja liasü.

States aser Union territories 33 kübok district 613 nungi application ajak senteper 9,331 liasü aser iba nungjagi application 4,532 agizük aser application 4,781 bo magizük.

Coronavirus wara mapang tsürabur anaprong asüba mesüra 'legal guardian' asüba ajanga takoksa angur lajartem nem arrshi küm 18 nungi ita shia senotsü teyari agütsütsü aser arrshi küm 23 ajungba sülen sen lakh 10 agütsütsü atema 2021 küm iba scheme ya tenzuka liasü.

PM CARES for Children scheme ketdangsütsü atema sorkari Ministry of Women and Child Welfare nem mapa nunglokja liasü.

Oman nung Oil tanker ka meküpa lendong nung India nunger 13 sama

New Delhi, July 17 (Agencies): Hombarnü Oman nunger tzüyim nung oil tanker ka meküpa lendong nung India nunger 13 samaogo.

Oil tanker nungji nisung ajak senteper 16 liasü; nisung 13 India nunger aser tanüingba nisung asemji Sri Lanka nunger liasü, ta Oman ketdangsertemi metetdaktsü.

Hombar nungi Oman nung ketdangsertemi kümzükba maparen tenzükogo, ajisüaka tang tashi shinga mangur, ta ketdangsertemi metetdaktsü.

Osangbenertem den jembidang India nunger tongti ketdangser kati, Oman nunger ketdangsertemi rong nung atema bushiba maparen nungji Indian foreign ministry-ia yaritepdar, ta metetdaktsü.

Maritime Security Centre-i ashiba agi, Comoros nunger wako songa aliba oil tanker

'Prestige Falcon' ji Hombarnü Duqm jila anasa aliba Ras Madrasah nungi nautical mile 25 shi pilar lia meküpa.

Oil tanker ji Aden nung aliba Yemeni Port-i aoba mapang nung tzüyim nung meküpa.

Metong nung metre 117 talang tanker ji 2007 küm yangluba lir. Alima nung tzüyim nung rong balala nung mapa inyakertem teimtibaji India nungertem lir. Ibayongji mapang shia rong lendong nung India nunger aika asür mesüra tzüyim nung auer telok balalai amakba ajanga India nunger aika takoksa angur.

Taküm April ita nunga Israel den tesendaktep aliba commercial rong 'MSC Aries' nung India nunger 17 Iran sepaitemi pua liasü. India aser Iran ketdangsertem tsüingda tongtepratepa jembiba sülen ang India nungertemji chioka liasü.



Paris, July 17, 2024: July 26, 2024 nungi Paris Olympics tenzüktsü lia tesem balala nung security agütsütsü atema India nunger CRPF sepaitem indang azü Vast aser Denby den sepaitem tangokba noksa nung angur. India nungi Canine team 10 France tonga ogo.



TIR YIMYIM YIMOBILEM (EDITORIAL)

DIMAPUR YANGTEPNÜ, JULY (CHITENI) 18, 2024

Oting ya tansütsü!

Naga nunger India den külemi alitsüsa akümba ajanga reshikangshi timtem, asü-ama lendong aser maksü ajuruba otsütem, temulung ashitsüka, aika lir. Kasaji, tanüa India ket nung Naga nungertem kasa lendong timtem aser maksü achi manener. Aji oda, Naga lima nung Naga nungertem India nunger ozüng tsübuba agi sadema mesenzüteter aser Naga lima adena orrbo India lima tesem balala nung Naga nungertemibo India nunger ta saka India nungertemi Naga nungertem ya India nunger masüa ta maksü ajurur ta Naga nungertem meraketa senso küma alidak tesem makai kümogo. Iba amaji, Naga lima nungbo Naga nungertem ya kangshia India nunger kümdaktsür saka oagi Delhi nungbo India nungertemi Naga nungertem ya India nungertema ta mamanger ta asüba tensa tia tsüngda Naga nungertem ya anogo shia tesem ka nung mesüra ka nungbo India sepaitem ket nung timtem aser maksü ajurudagi ta bilemdi. Iba amaji küm 60 jakdang nungi India sepaitem ket nung asenok Naga nunger reshikangshi aser timtem ajuruaka asenoki tan masür, ashiko ibaji asenok sensakba agi India nunger sepai teyari magii meliteter asütsüa akok mesüra mapa manguba agi India sepai akümtsü rakteper asütsüa akok. Ajisüaka, alemli atalokba anogo tamajungtemji amadokyonga, yashi 2021 küm December 4 nü Oting nunger ayanger tai maketba nisung 13 tashi India sepaitemi taochi maka khaseter parnok tasü mang dena bener ajentsü merangba otsüjibo Naga nungertemi mamadoktsüla aser tai maket ayangertem khaseteremji sepai asüyonga masüyonga tapet temerenshi agütsütsüla ta tatem tashi Naga nunger ajak longjemer akangtsüla. Atangji, ibaji aibelenertem dang tai medoknüba agi masü mesüra kar anema tamajung inyaknüba agia masü saka Naga nunger tai maketba nisung India sepaitemi khasetbajibo kecha hau ta mali, Naga nunger takümü an chana memeyong amshitsübaji masü aser iba ama mapa jagibo Naga nungertem taküm agi matitsü ta tarutsü asoshiang shisa tebuluba bolua bilemba agi inyaker asütsü. Khen bilemtsübo, asenok Naga nungertem ya India sepaitemi hau ta mali mezüngmeshitsüsa aliba ya asenok meputep aser majungba agi asenok ya India nunger aliba agi alir amai alir aser aiben India sepaitem dak jenoker. Aji dang masü, asenoki India nung asenok timtem lendongi aitsüsa kechi temzüng ozüngsa lateta aliar memetet aser mejangja zübazübaa alir, iba jagi yashi Oting lendong atalokba ama atalok dangang asenok aoksar aser akoksar. Nakmati atudak hopta junga ayanga monger, amongnü pei kinungertem den anisüngzüka pei yimtak pei kidang külemi amongtsü ooya alidang, ano anüa mai, anungji tesangwa, ajisüaka kecha tekümdangtsü olaa magütsüi yimtaklir taküm paikaji khaseteremji mapanga magii obendangdak nungi tapet obendang agüja tansütsüsa merenshitsü melen sepaitemjiang metentsür, parnoki tai maketba taküm samatsüba ken o jibo obendangdaka agizüka mejembitettsüsa akümbaji Armed Forces Special Powers Act (AFSPA) ozüng lateta akaba ajanga lir, kechiyong iba ozüng yagi Naga lima nungbo India sapaitemi nisung dak temulung melemba kuli kija agia khasetsü temeten agüja lir aser iba mapaji anema linük nung kecha okadaka ken o benoktsü makok. Iba ozüng kübokji asenok pelashishia "Cease Fire" nung alir. Atangji, Cease fire nung alir, saka Oting nung atalokba amaji Naga lima mashi tesem nung mashi ka dak ataloktsüa akok, kechiyong AFSPA ajanga sepaitem nem tashi aser temeten agüja lir. Tangbo, kena state government-ia temulung agüja inyakba agi Oting ken o ya Supreme court nung obendangertemi agizüka jembiba angashir. Joko, Oting nung ama mataloktsüsa asenoka temetetba nung aser wainshin nung aser talisa tangatetba nung tangari asenok mezüngmeshitsüsa malitsüla aser pei lima nung tangar nüken tsübua malitsüsa AFSPA ama yabo state government-ia agientetsüla.

OLEMSABANG

DIMAPUR GOVT. COLLEGE AO KAKETSHIR TELONGJEM

SOBALIBA SENTONG

APRIL 13TH, 2024 NUNG JEMBIBA

O JEMBIR: L. SOSANG JAMIR, D.C. (JUDICIAL) RTD.

ONÜK: "AOR KIPALEMBU"

Koba Kin südir süang. Kin ka tebor ajungbaji sobaliba dak sendaka lir. Sobaliba tejangja maliba kin kaji tera maliba nubur ama asütsü.

Asen Ao kin tetsü-tebu shisa-shiri Chungliyimti lima alidang meimchir soya-pokya sobaliba-a aodang tekümdangtsü temzüngchizüng lateta yutsü koba dang Aor sobaliba ta aja. Ni bilem nung asen Aor Sobaliba ya Naga kin ajak dang tajungba alitsü südi. Aor Sobaliba nung tetsür ka tebor ka tena Kin-Kidong ka süra tena alitsü makok. Saka tetsürla aser teborsang tena Kin balala nungi asü nung dang tena lembutsü akok.

Anungji tamasa Aor tetsü-tebo alipoker (1) Tongpok Pongen, (2) Longpok Longkum aser (3) Longjakerep Jamir parnoki Aor Sobaliba nung Kipalemba tejangja tenteta yutsüba yamai:

1. Tongpok Pongen i Elongshi Jamitsür den ali.
2. Longpok Longkumer i Longkapokla Pongentsür den ali.
3. Longjakrep Jamir i Yongmenzala Longkumtsür den ali. Itemji asen Aor Sobalibai melaba nung Kipong mezüng akümer tem liasü ta angazük.

Aor Sobaliba tajung kaji kodang tebor ka ina kümdir Arijü nung ayiptsü, yangji pai taküm nung teinyaktsü mapa tem ajak tain tem nungi angazüker kelen ang pa kibong aküm.

Ano tetsür chanu ka kodang aeir kümdir la I tsürabor ki doktsütsü aser lar Kidong ametsür (widow) ka kidang oa idakji la kibong maküm tashi ayiptsü aser idakji tetsür ka taküm nung teinyaktsü mapa tem angazüktsü, koba dang Tzükitem (Dormitory) ta ajar, la idakji ayipba mapang la temang nung teptsü (tattoo) ateptsü.

Teptsüji yamai ateptsü:

1. "Tsünpangrem"- Tetsüng temola nung ateptsü.
2. "Teko" (chest) nung ateptsü
3. "Temokok" aser "Temakup" nung ateptsü
4. "Tawang"-Teküm nung ateptsü.
5. "Tepen" anatsülen ateptsü
6. "Jangmo" alentsü (ateptsü) Aji tsünpangrem dak metenloka ateptsü.

Ibaji aeir ka taküm nung teptsü atepba tatepang lir.

KIPALEMBU: Kodang Aeir ka la taküm nung teptsü abensa tepdir, la keyi aotsü akok. Yamaji Asangur ka aser Aeir ka tenaji Kin-Kidong balala nungi asütsüla. Saka Kin ka nungi Asangur ka Aeir ka lembutsüji Aor Sobalibai memelar. Kodang Aeir ka Asangur ka ta tena Kin balala nungi kibong akümtsü melungtepa lidir, tenadi pei tsürabor dang asüngdangtsü aser parnok nungi tenokdangba malira, Asangubai pa "Tembo" o "Ase" (close friend) ta anir Ango (Fish) boi aotsü aser iba angoji Aeirla tsürabor nem agütsütsü. Iba ango agütsüba dangji "KILANG" mesüra "KILA-NGO" ta ajar. Iba tetezü Aeirla Asangubai aniasüngba (engagement) süogo ta metetdaksüba. Tasüngnep asanguba "Tembo" o "Ase" nadi Asangubar tsürabori Aierlar tsürabor nem tsük tin ishika (parnoki akokba) ka bener oa agütsütsü. Iba dangji Mongsener I "JENMEN" ajar aser Chungliri "SENMEN" ta ajar (marriage price) koba dang anizük tsük ta ajar. Tetsürlai ango (fish) to jungjunga sor ata alitsü. Yangji parnok pelatepa chiongtsü. Aji sür tetsürlai Sü (Shawl) tajung ka tebursang nem agütsütsü, iba dangji ani zük Sü ta ajar

Aji sür Asangubai Ki asütsü atema Süngkum bententsü. Süngkum tem ji ajak tasen dang bententsü, tejen kata magitsü. Ano süngpok süng mesüra tekira süngkum kata magitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mission for Christ tentetsang, Rev. Lalchungnunga alima nungi pilaogo



Rev. Dr. Lalchungnunga

July 17, 2024: Mission For Christ tentetsang aser Tir, Rev. Dr. Lalchungnunga Amongnü (July 7, 2024) alima nungi pilaogo; pa arrshi küm 91 liasü.

July 7 nü pa Mizoram yimtiba, Aizawl nung lia asüba sülen July 8 nü Durtlang Leitan Hermon nung aliba Mission for Christ Headquarters nung asüpila sentong agia mang remtsüogo.

Pai Khrista osangtajung prokba den külemi makamaitem aser timemertem yaria aru.

Rev. Dr. Lalchungnunga ya 1933 küm May 17 nü Mizoram nung Lunglei district kübok Pukpui nung aso. Kibong nung tanur 11 rongnung pa tenetbuba liasü.

Pa tebu, Taikhuma-i 1928 küm nungi 1954 küm tashi yimsüing aika nung tongti yimsüsür inyaka aru.

Lalchungnunga-i 1964 küm mezüing Tsüingrem tenzükba ministry tenzükba liasü. Pa mapang talangka shiranga aru aser Tsüingremi pa aneptsüba sülen pai Tsüingrem tenzüksü apiteta liasü.

Mizoram nung aliba Presbyterian Arogo ka nung putir,

Lalrinmawii Fanai-i, "Pa paralysis asüba sülen küm pezü tashi yipten nung dang liasü saka tesüsa anep. Iba tashidak anepba ajanga pai pa taküm piyong Tsüingrem tenzüksü atema bendanga agütsü," ta metetdaksü.

Fanai-isa, "Akhidangbo temelungjang, shi aser tanela ajak tekümtet tejangja anguba mezüingshii liasü. Pai Laishiba nung aliba ama indangindanga ali," ta metetdaksü.

Khrista osangtajung sayutsüingitsü, Tsüingrem O sayutsü aser taneptsüba sentongtem agitsü nükjidong nung 1983 küm Lalchungnunga-i mission organization 'Mission for Christ' tenteta liasü. 1989 küm Mission for Christ-i Missionary Training Centre ka amenok aser 1991 küm Rev. Dr. Richard Wurmbrand-i iba centre semzükja liasü.

Fanai-i, "Pai tetsü oshi, Mizo oshi nung sayutsüing aser ibaji Zofa nungertemi pelaa agizük. Lalchungnunga-i tetsüing agi mile 1,500 dak tema jaja sayutsüingiba ajanga nisung merirjang aika Khrista dangi anio," ta metetdaksü.

Tamang agi alitsü aser jajatsü atema nisung aika nem training agütsütsü nungdak, ta apiteta Lalchungnunga-i Mizoram-i tanaben meyipa aruba sülen Mission for Christ (Worldwide Mission) tenteta liasü.

Pa indang ministry ji alimaia meteta aküm aser 1983 küm Amsterdam nung ayongzükba 'global evangelists meet' nung adentsü atema Billy Graham Evangelistic Association (BGEA)-i pa-a jaoka liasü. 2004 küm Tulsa, Oklahoma, USA nung aliba International Gospel Centre-i pa 'ordain' aser 2006 küm Rangoon nung aliba Evangelical Bible Seminary-i pa nem Honorary Doctorate agütsü.

Fanai-i, "Lalchungnunga aser pa indang ministry anemertem aika liasü aser tayongzükba jenti liasü saka pai matsüingshii nokdak," ta metetdaksü.

Rev. Dr. Lalchungnunga-isa 2005 küm tanurtem atema Abundant Life Home amenoka liasü aser tanü tashi Mission for Christ Home Board kübok iba Home anepalur.

Tesüiba küm ter tashi pa temang manemi aruogo aser 2020 küm nungi pa anaben tashi Aizawl Civil Hospital nung among. July 7 anepdang 9:15 ako nung pa süngjema amouzüka ao.

Mizoram Chief Minister, Lalduhoma-i, Lalchungnunga ya Mizo nungertem rongnung kanga tushiba Khristan lenirtem rongnung ka liasü, ta tetushi agütsü.

"Rev. Dr. Lalchungnunga-i küm 66 tashi Tsüingrem tenzükba aruogo. Pai iba lima nung tamangtir ka ama liogo," ta Fanai-isa metetdaksü.

ANOGO ABEN TSÜNGREM DEN

TEPELA NUNG ALITSÜ SHIMTETDI

Telok jagi parnok anema külemi noktak aser bendangertemi parnok sü shizükja parnok dak merang ajok agi azüksü özüing agütsü...saka ayatrem nungang aser Sila Tsüingrem dang sarademya aser pa nüngsang ken tenya liasü, aser tepuokdak alirtemi parnok dang angaya liasü. T. Mapa. 16:22-25

Kenü anogo Paul aser Sila sarasademdaki oya alidang, temenen tanela ain aketba killitsür ka ajuru, shibai lar kibur atema iba sempet amshia liasü. Aser panüji Pauli Yisu Khrista tenüing nung temenen tanelaji la dak nungi aritok. Saka kodang la kiburi par tajangzük angutsü lenmang mali ta ajitet, parnoki Paul aser Sila apu aser yimsüsürtem dangi anirer tiyazü kuli agütsü aser parnok dak merang ajok agi aiben züker tepuokdak ayu. Iba ama züka merenshir tepuokdak yua timtemseta liaka tenadi Tsüingrem tenüing sanga sarasadem aser ken aten. Tepuokdak alirtem aser tanükertemi iba sarasadem aser kentenba anga-a liasü. Iba aonung menoknok tulu anak, kishi ajak lapok, tepokdak aliba nisungtem tsüngden aser yinzütem sala-adok. Tepuokkertem anüksang mejanga aliba sak, aser kodang kishitem lapoka angu, pai pei noklang nok agi pei sasa tetepseter dang lia Pauli ola tulu agi ayimtena pa kümzük.

Paul aser Sila temerenshi tulu agi merenshir tepuokdak yuaka jashitsü melena, "Ya Khrista" asoshi ta tamang agi agizüka iba timtem toushi mapang tenüingsang aser tepela ken tena sarasadem. Rom 5:3" saka asenoki timtem tekangshi nung pelatepdi, kechiaser timtem tekangshi... tasü lait adoker." Tamanger tajung ama tensa tia ajak nung pelaa alitsü angazükdi.

Gaza nung aliba Tenla ki ka nung shirangertem jenokdakja yarir



July 17, 2024: Tesüiba ita 9 tashi Israel sepaitemi Gaza Strip nung Hamas telok anema raraba mapang St. Philip Arogo nung putirtemi iba Tenla ki ya hospital ka ama yanglushia yirurtem aser shirangertem jenokdakja yaridar.

Gaza nung Anglican Arogoi ketdangsüba Al-Ahli al-Arabi hospital densema hospital balala nung yipten agi mataba dang masü saka medical facilities agi anüingba mapang nung Arogoi Tenlaji hospital ama yanglushia shirangertem yarir.

St. Philip Arogo nung putir, Munther Issac-i, "Tenla kidang sarasademtsü atema yangluba

takdangji clinic ka küma yanglushiogo. Tanübo onok atema tongtibangtibaji akokba tashi meimchir aika kümzüksü atema lir," ta metetdaksü.

St. Philip Arogo Tenla ki ya Al-Ahli al-Arabi hospital indang kasa moapu nung lir.

"Department balala nung shirangertem agizüksü atema takdang mali, anungji onoki iba tesem ya (Tenla ki) hospital ama amshitsüsa aküm," ta Doctor Mohammed al-Sheikh-i ashi.

"Yipten agi anüingba ajanga onoki shirangertem menden nung mejangdaksür," ta pai ashi.

Yaküm October 7 nü Hamas teloki Israel amakba mapang

nung nisung 1,200 tepset aser nisung 250 shi puer oa liasü.

Kasa anogo nungjagisa Israel-i Gaza nung Hamas telok anema rara tenzük. Tang tashi nung Palestine nung 38,000 shi tepsetogo aser nisung 80,000 dak tema yiruogo.

St. Philips Tenla kidang shiranger yarir kati, "Iba Tenla ki ya joko tekülem sentong agiba tesem ka masü saka nursing facility ka kümogo," ta ashi.

Paisa, "Iba ya ajanga northern Gaza nung Muslim nungertem aser Khristantem tsüingda amalitepa yaritepba kuli sayur," ta paisa shisem.

UP nung anti conversion ozüing kübok Khristan 7 apu

July 17, 2024: Uttar Pradesh state nung tatalokba balala ana nung anti-conversion ozüing kübok pastor ka densema Khristan tenet puogo.

July 14, 2024 nü Maharajanj district nung police-i Pastor,

Ram Udeshy Sahani den Babulal Sahani aser Vinod Kumar nung apu. Parnoki sen agütsüba den külemi sayatnya agi aneptsütsü, ta nisung ka mesüzüka Khristan yimsü dangi meyipdaksü, ta parnok nem tai tonglokja liasü.

Iba district kübok Senduria yimdak tetsür kati police dang, Khristantemi la kinüingbu, Anil mesüzükba sülen la kinüingbui Khristan yimsü agizük aser pai kidang nungi Hindu nung 80,000 tsüingremtem noksa ajak indok, ta metetdakja liasü.

July 16 nü police-i Babulal Sahani aser Vinod Kumar nabo bail nung chiok saka pastor bo mechio.

Ano Moradabad district

nung Khristan pezüi Hindu nungertem Khristan yimsü dangi meyipdaksür, ta Hindu telok Vishwa Hindu Parishad (VHP)-i tai tongloktsüba nung ajemdaker police-i Khristan ana apu aser ana bushidar.

VHP lenir, Pankaj Singh Pal-i police dang, Khristantem jagi Hindu nungertem dang fridge, television, bicycles, motorcycles aser sewing machines agütsüba den sen 25,000 agütsütsü, ta nangzükba Khristan yimsü dangi meyipdaksür, ta Khristan pezü nemji tai tonglokja liasü.

VHP lenir jagisa, parnoki nisung 50-60 shibo Khristan yimsü dangi meyipdaksüogo, ta tai tongloktsü.

Ajisüaka Uttar Pradesh kübok Varanasi yimti nung Indian Missionary Society nungi putir Mathew-ibo, "Tatalokba anapronglaji Khristantem nem tiyazü nung tai tongloktsüba lir," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Taju

(adj) tatutsü atema narepa yangluba (pointed)

* Nok taju agi ali atur.

Tajung

(adj) tamajung mali, shitak aser tapet (good)

* Ozü medemer nisung tajung aika lir.

OLONG PAITEP # 6848

1			2			3			4
			5		6		7		
8									
			9						
	10								
								11	12
			13				14		
15						16			

TIPLIN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang
tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6847 TELANGZÜBA


TIPLIN :

- 1. Kasa, 6. Rangben, 7. Mait,
- 9. Poktet, 11. Ati, 13. Atasa, 16. Rür,
- 17. Rajang, 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba,
- 5. Anü, 6. Rätet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju, 21. Anö,
- 22. Onü, 23. Kua.

NAI-A YA METETTER MA



Egypt nungger kati mapang tatsütiba tsüngda Seven Wonders of the World semdangba atema world record ka yanglutetogo. Arishi küm 45 tain Magdy Eissa-i anogo 6, ghonda 11 ser minute 52 nung Seven Wonders of the World sema senzü aser pai public transport dang amshi. Tesüiba nung England nungi Jamie McDonald-i iba Guinness World Records (GWR) nguteta liasü saka Magdy Eissa-i pa ajatetogo.

Gegong Apang sülen Pema Khandu-i mapang talangba CM inyaker



Itanagar, July 17, 2024

(Agencies): Arunachal Pradesh nung taoba Chief Minister Gegong Apang sülen mapang talangtiba chief minister inyaksangji Pema Khandu lir.

Pema Khandu-i July 17, 2016 nungi Chief Minister inyaksü tenzük aser khen danga methitemi inyaka arur.

Gegong Apang-i January 18, 1980 nungi January 19, 1999

tashi Arunachal Pradesh nung chief minister tasembuba inyaka liasü. Iba sülen pai August 2003 nungi April 2007 tashi inyakogo. Pa ya tang Janata Dal (Secular) züngsem lir aser 2016 matongdang Indian National Congress züngsem liasü.

Pema Khandu-i tebu taoba Chief Minister Dorjee Khandu asüba sülen 2011 küm Pema-i Mukto menden nungi Congress

ticket amer takok ngua liasü.

July 17, 2016 nü Pema Khandu arishi küm 36 asüadang Arunachal Chief Minister inyaksü tenzük.

Iba sülen September 2016 nung pai MLA 43 anir People's Party of Arunachal (PPA) nung aden. Kasa küm paisa PPA den tesentaktep pila aser MLA 33 anir Bharatiya Janata Party (BJP) nung aden.

Pema Khandu-i 2019 Assembly elections nung takok tulu nguteta liasü. Assembly menden 60 nungi 41 nung parnoki takok ngua tanaben atema chief minister inyak.

June 13, 2024 nü Arunachal Pradesh Governor Tathagata Roy-i Pema Khandu kumsük tasemben atema chief minister inyaksü tezüngzüktep agidaktüsügo.

Assam kübok Cachar nung telungpur 3 khaset

Guwahati, July 17, 2024

(Agencies): Assam kübok Cachar district nung sepaitem den khatepdang telungpur 3 khaset.

Assam-Mizoram arrtsü anasa Bhuban Hills nung iba ya atalok aser sepaitem den khatepdang telungpurtem khaset.

Tanep Dhalai Ganga Nagar, Cachar nung telungpur asem

den prangpongtem apu. Superintendent of Police Nomal Mahatta-i aniba telok kati iba mapa ya inyak.

"Anepdang züngia Cachar Police-i Assam aser Manipur nungi Hmar telungpur 3 khasetogo. Police-isa AK rifles 2, tanga rifle 1 aser pistol 1 apu"

ta Assam CM Sarma-i metetdaksü.

Bhuban Hills nung jenoka aliba telungpurtemi police dak injang khaloktsü. Parnok tsüngda ghonda ka shi khatepdang telungpur asem khaset. Tasürtem ya Cachar nungi nisung 2 aser Manipur nungi 1 liasü.

Iba mapang police asem yiru aser Cachar police indang gari ka raksa ta osang ajanga ashi.

Moreh nung Myanmar nunger refugees 60 jangjaogo

Imphal, July 17, 2024

(Agencies): Manipur nung state aser central security forces külemi mapa inyakdang Moreh nung Myanmar refugee 60 tashi jangjaogo.

July 15 nü Moreh nung border pillar 80 anasa aliba Govajang yimtsüng nung parnoki mita aodang refugee

tem jangjateta liasü.

Iba mapa ya Manipur police, Assam Rifles aser Border Security Force (BSF) külem telok kati inyak.

Manipur police Additional SP, Md Riyajuddin lenisüba kübok mapa inyakdang parnok nisung 60 tashi Myanmar nungi arrtsü adena aitba jangjatet.

Assam Rifles-i refugees nungi biometric data bendenogo. Tengenoupal district police-ia refugees indang biometric bendentsü metetdaksügo.

Myanmar refugee temi Moreh police station nung osang agütsütsü tetuyuba agütsügo.

Arunachal nung 60 buba Femina Miss India Grand Finale alitsü



Itanagar, July 17, 2024

(Agencies): Arunachal Pradesh nung 60 buba Femina Miss India indang Grand Finale alitsü akok ta chief minister Pema Khandu-i Bodbarnü ashi.

"Junga dang jembitepra Arunachal Pradesh nung otsü tasen ka yangua 60 buba Femina Miss India Grand Finale amongtsü" ta CM Khandu-i ashi. "Onoki Miss India

Organization den olemtepogo aser iba meraket sentong alitsü atema infrastructure tajungba kümogo" ta pai ashi.

Arunachal Pradesh nung alima tobur tajung aser sobaliba senmang aika lir aser iba amala sentong agitsü kanga temjena lir.

Femina Miss India pageant ya beauty, talent aser grace ajungketba sabang tajung ka lir aser linük cultural aser

entertainment jenjang keta lir.

Arunachal Pradesh nung Femina Miss India Grand Finale amongba ajanga tourism jenjang ajungkettsü aser state sobaliba takar sayutettsü.

Arunachal Pradesh nung 60 buba Femina Miss India grand finale agira ibaji Northeast nung state tanabuba nung agir asütsü.

2023 küm Manipur nung 59 buba Femina Miss India agia liasü.

Trump tepsettsü merangba indang tai tongloksüba Iran-i aitsür



Donald Trump

Tehr, Chiteni/July 17 (Agencies): Taoba US Tir Donald Trump tepsettsü atema tasa yanglua arur ta United States media ajanga ashiba Iran-i ain adoka aija liasü.

Republican telok nungi tir akumtsü teimla alisang tepsettsü atema tasa yanglua liasü ta tai tongloksüba Iran-i magizüker, ta foreign ministry odongtar kati Bodhbarnü ashi. Ajisüaka 2020 küm senior military official ka tepsettsü atema Trump-i totuyuba agütsüba atema Iran-i Trump nem temerenshi agütsütsü nükjidadong lir, ta Nasser Kanaani-i ashi.

US ketdangsür tenüng meshiaka Iran-i Trump takum nung timtem agütsütsü ta US ketdangsürtemi tawa angazük, ta CNN ajanga Mongulbarnü ashi. Iba mechi US secret services-i taoba tir indang security

akangshi.

Yamaji süaka Honibarnü rally ka nung Trump dak akhaba menokdangtet. US osang nungbo Pennsylvania nung Trump dak akhaba ya Iran den sendaktepa mali, kechiaser iba mapa ya arishi küm 20 tain nisung ka kisüngi inyak ta shia lir.

Tawa Trump dak prangbong agi akhaba mesüra Iran-i iba ama mapa inyaktü tebilemba lir ta jembiba Iran-i khenyongi magizüker, ta Kanaani-i ashi.

Ajisüaka 2020 küm Islamic Revolutionary Guard Corps (IRGC) commander Qassem Soleimani tepsettsü atema totuyuba agütsüba nung Trump-i shilem agiba atema merenshitsu temulungtetba lir, ta pai nenshia ashi.

Soleimani tepsetba atema Iran-i tayang kepzüksü akok ta US ketdangsürtem mapang talangka nungi kumdanga arur. Tehran-i mang ayangtsü nangzüka lir.

Taoba Secretary of State Mike Pompeo aser taoba national security advisers John Bolton aser Robert O'Brien nunger danga tenük yoktsü akok ta tsübo ba bilemer.

Iran nungeri Trump tepsettsü asoshi tasa yanglur südi ta itdangiter temi osang angazükba sülen Trump indang security

akangshia akum ta osang ajanga ashir.

Ajisüaka National Security Council odongtar Adrienne Watson-i sangdong ka agütsüba nung Trump asoshi Iran-i timtem agütsütsü ta itdangiter osang ya national aser homeland security indang teinyaktü tongtipangtiba lir ta shia liasü.

Pennsylvania nung Trump dak akhaba indang bushisügangba nung injang khaloktsüsang den dangar mesüra külemi tasa yanglur, bendanger mesüra linük nungi shinga meliasü, ta lai ashi.

Secret Service odongtar Anthony Guglielmi-i ashiba agi, lendong timtem agütsütsü indang osang tasen maneni angazüker aser onoki nüngdakba mera agir.

Anti-terrorism aser border security ketdangsüba US Department of Homeland Security nungibo timtem lir ta asüba indang nung telangzüba agüja mali.

Butler County nung Trump dak metres 150 (feet 500) dang pilar kilem nungi injang khaloktsüsetba atema US Secret Service dak temulung masüba mapang ka Iran indang osang ya arur.

US Secret Service ajanga iba tatalokba ketdangsüba indang reprangshitsu US Tir Joe Biden-i totuyuba agütsügo.

SÜR KÜM KA AJUNGBA BILEMTETER

Tsüngrem den teti tatem makadak alitsü atema Pai na anir or küm ka abensar. Na onok den meliakasa temulung shirangseta bilemer. Asenok külemi liyonga aruba menungrar aser na onok temulungjang nung teti alitsü.

Onoki na kangsa meimer. Majurutep tashi salem.

- Ne temeim Kinungbo, Tanurtem, Semchirtem aser Anukapang.



Asür Mrs. Sentongenla (18.7.2023)

Bangladesh nung university aser college tem shibangtsü

Dhaka, Chiteni/July 17 (Agencies): Bangladesh sorkari sangdong ka ajanga linük nung Bodhbarnü nungi tenzüka public aser private university tem ajak mapang telantet ka makai shibanga atatsü ta metetdaksügo.

Sorkar mapa atema menden mekazüka toktsüba dak sendakba nung nübürtemi longkak aitba iba hopta kanga mejungi küma nisung trok tashi sügo aser nisung aika yirua liasü.

South Asia nung aliba linük nung nübürtemi public sector job quotas dak sendakba nung longkak ait tenzüka sülen hopta ishika mepetmesü nung arudar. Menden mekazüka toktsüba nung, 1971 küm Pakistan nungi nüjiso atema raraba mapang shilem agir kinungtertem nem menden shilem 30 mekazüka toktsüba densema lir.

Iba ajanga kaketshirtem kanga mepelar, shimok mapa manguba ajanga kanga timtema arudar. Bangladesh nung nütsünyongtsük million 170 nungi lanur million 32 shi mapa mali mesüra kaketshisatsü monguteti lir.

Ato Kilonser Sheikh Hasina-i, longkak aitertemi akhangba mataloktsüba sülen asendenshir longkak ait tenzüko. Okadak ken o bangdaka lir ta shia PM-i parnok takhangba mataloktsü aser menden mekazüka toktsüba anemertem dang "razakar" aja, koba 1971 küm Pakistan army den longjemer inyaktertem dang ajangaba nungja ka lir.

Iba hopta menden mekazüka toktsüba anema longkak aitertem meyrejang aika aser linük yimsüsü aliba Awami League party indang student wing na mangatetep adokba sülen tensa kanga mejungi aküm. Police temi longkak aitertem senshidaktsütsü atema tear gas aser rubber injang amshia liasü.

Mongolbarnü mangatetep adokba mapang kaketshir asem densema nisung trok tashi yiruogo, ta police-isa metetdaksü.

"Onoki Bangladesh sorkar dang yimjung nung longkak aitertem kümzüka toktsütsü aser yirur alirtem temang kanga junga anepalutsütsü mepeshir," ta Amnesty International-i X sabang ajanga ashi.

Ketdangsürtemi temzüng ozüng azüoktsü atema linük ajanga nung university campus temi riot police den Border Guard Bangladesh paramilitary force yokogo.

Mongolbar aonung University Grants Commission-i university ajak shibangtsü tetuyuba agütsüba

den kaketshirtem dang security dak sendakba nung campus toktsür aotsü ajungshia liasü. High school, college aser tanga educational institution tema ajak shibangtsü tetuyuba agütsügo.

Anti-quota longkak aitertem indang coordinator Nahid Islam-i, kaketshirtemi asürtem nem aküm tetushi agüja tasümayang süngden bener Bodhbarnü longkak aitsü ta shia liasü.

"Student league züngsemtemi amaktsü akok ta tsüba bilemba ajanga kaketshir aika dormitory tem toktsürogo," ta Dhaka University nungi tetsür kaketshir kati ashi.

"Kaketshirtem aika anunga lir aser talisa tebur dormitory nung aika anunga lir. Dorm nung alirtem toktsür aotsü temela masü," ta kaketshir yagisa shisem.

Kasa mapang nung police-i Mongolbar aonung Dhaka nung opposition tongtibang Bangladesh Nationalist Party indang headquarters meita ao aser activist tenet pua liasü, kong taoba mapang party indang student wing lenirtem densema liasü.

Police indang detective branch tekolakba Harun Or Rashid-i ashiba agi, headquarters meita aoba mapang police-i crude bomb 100 aser petrol bottle aika ngutetogo. BNP office anasa bus ka mi senoka rongtoktsüba sülen iba tesem meita oa liasü.

BNP indang senior joint secretary Ruhul Kabir Rizvi-i, headquarter meita aoba aitsügo aser ashiba agi, sorkari menden mekazüka toktsüba anema longkak aitertem tenüng menüktsütsü atema item crude bomb tem tokja liasü.

January ita election koka term pezübuba atonga sorkar kümtetba sülen Hasina-i aniba party tang mezüngbuba longkak aitertemi timtem agütsüdar.

Mongintemi ashiba agi, private sector renloka maoba ajanga nübürtem mesüngjemteti akümer, kechiyong sorkar mapa ajanga itasen danga masü saka tanga maongkatem aika agütsür aser iba ajanga nübürtemi sorkar mapa kanga aginür.

Bangladesh nung tang sorkar mapa shilem 56 quota balala atema mekazüka tokja lir, kong tetsürtem atema shilem 10, tangar memenepe aliba district tem nungi nübürtem atema shilem 10, indigenous kintem atema shilem 5 aser mata mabensartem atema shilem 1 densema lir.

FOOD SAFETY DURING MONSOON

CHIYONGTSÜ TAJUNG CHIANG

- Masodang aonsotsü aser süngjanglijang tzü temürek agi shidokang.
- Chiyongtsü machidang soang aser tonglemshiang.
- Sor aliba chiyongtsü room temperature nung ghonda ana dak tali teyutsü.
- Chir anüngba chiyongtsü aser shisa aoba chiyongtsütem refrigerator nung yuang (5? tekübok ayu tajungba).

Sorochoikdak Tesem Müreka Yuang

- Chiyongtsü mamshidang osettsüset ajak mesen tepsetba mozü agi shidokang.
- Tzü tatsük aser mesen tepsetba mozü agi sorochoikdak atem mürekang.
- Osettsüset shidokang aser mürekang aser rizünga mayudang kongdakjang.
- Nü indang fridge tema telong mürekang aser hopta ana nung khen defrost süang.

State Food Safety Authority, Department of Health and Family Welfare, Govt. of Nagaland.

Luka Modric-i ano küm 1 atema tenangzüktepba yanglushiogo



Luka Modric

Chiteni/July 17, 2024 (Agencies): Croatia nungur midfielder Luka Modric-i ano Real Madrid den küm 1 atema tenangzüktepba yanglushiogo, aser iba tetezü pa club nungi 2024-25 season tatem tashi asayatsü.

Iba tenangzüktepba yanglushioba sülen pa Madrid nungi küm 13 atonga asayatsü. Pa 2012 küm Tottenham Hotspur nungi Madrid nung oa dena liasü.

Kasa mapang nung 2024-25 season atema pa Los Blancos pur captain kümstüogo.

Arishi küm 38 tain Modric ya Madrid indang midfield nung

kanga tongtibang asayar ka lir aser pai iba club nungi asayaba mapang Champions Leagues trok aser LaLiga pezü kokogo. Pai ajak senteper takok marok 26 ngua lir.

Croatia nungur asayar ya European Cup trok akokba asayar pongu rongnung ka lir aser club puti otsü nungi pai takok marok timtiba koka lir.

Modric-i tang tashi nung Real Madrid nungi asaya 534 nung asayar lir aser iba mapang goal 39 idaktsüogo. Kasa mapang nung pa Croatia tenung nungia asayar 178 ben asayar lir, koba linük tenung nungi asaya timtiba nung asayaba asütsü.

Real Madrid puri UEFA Champions League final nung Borussia Dortmund akokba sülen season metenzük tsüingda Modric tarutsü indang kanga tongtibangsa sensaksema aruogo.

Ajisüaka manager Carlo Ancelotti-i pa dak maneni kanga tamang akar.

"Modric dak sendakba nung kecha teblemstü mali," ta coach Carlo Ancelotti-i iba ita ashi. "Pa alima nung asayar tajungtiba rongnung ka dang masü, pa nisung tajung lir. Pa dak sendakba nung kecha teblemstü mali aser malitsü," ta pai ashi.

Mumbai FC-i Hardik Bhatt alizükogo

Chiteni/July 17, 2024 (Agencies): Mumbai City FC-i defender Hardik Bhatt den küm ka atema tenangzüktepba yangluba sangdongogo. Pa 2024-25 season tatem tashi asayatsü.

Arishi küm 27 tain asayar ya 2022-23 season tatembanglen loan nung oa asayaba sülen tang Mumbai-i meyipa aruogo.

Mumbai nung soa intetsang Hardik ya right-footed full-back ka lir. Pa indang professional career ya 2019 küm Ahmedabad nung ARA FC nungi tenzuka liasü. Iba sülen pa Bengaluru United, Hyderya Sports, aser Rajasthan United nungi asaya aser 2023 küm January ita Mumbai nung dena liasü.

2022-23 season nung Hardik Mumbai FC nungi asaya pezü nung asaya. Pa Indian Super League aser Super Cup naprongla nung club tenung nungi asayaogo. Pa ya 2023 küm ISL League Winners' Shield akokba team nung densema liasü.

2022-23 season tembangba sülen pa Rajasthan United-i meyipa ao, kong pa I-League 2023-24 season nung asaya 14

nung asaya liasü. Iba mapang pai assist ana sütsü aser team league nungi relegate mesüi asayaba nung teyari agüja liasü.

Ajak senteper Hardik-i tang tashi nung India nung domestic asayamung balala nung 47 ben asaya lir aser iba mapang pai goal ana idaktsü aser assist ana süja lir. Pa tang Mumbai City nükjiding tongdaktsütsü atema teyari agütsütsü asoshi renemer lir.

Hardik Bhatt-i ashiba agi, "ni Mumbai City FC-i meyipa aruba atema pelar. Iba club ya ni atema kanga tongtibang lir aser tanaben club jersey asemstü maangka anguba ya tetushi tulu ka lir. Team-i takok tajung ngua arudar aser taruba season nunga team takok ngua asaya aotsü atema teyari agütsütsü yongya atar."

Kasa mapang nung Mumbai City FC Head Coach Petr Kratky-i, "Hardik club-i meyipa aruba atema pelar. Pa Mumbai nung soa ainba asayar ka lir, shiba onok den taoba mapanga asayaogo aser pa asaya jenjang ajungketshitsü aser onok tejakdangi aotsü atema teyari agütsütsü bendanga agütsür lir," ta ashi.

Rafael Nadal US Open entry list nung züngoksema lir



Rafael Nadal

Chiteni/July 17, 2024 (Agencies): Taoba küm pezü tsüingda US Open asayamung asem tashi nung shilem magiba sülen Rafael Nadal taküm iba iba asayamung indang main draw entrance lists nung züngoksema lir.

Arishi küm 38 tain Spain nungur asayar ya protected ranking (9buba) bener August 26 nü nungi tenzuka asayatsü aliba asayamung nung shilem agitsü.

May 27 nü sülen Mongolbarnü Nordea Open nung mezüngbuba kija asaya asayaba mapang Rafael Nadal-i 6-3, 6-4 agi Leo Borg kokogo. French Open nung mezüngbuba round nung

Alexander Zverev-i tsükdaktsüba sülen Nadal khen danga masayai liasü.

2019 nung US Open akokba sülen Nadal 2022 küm dang iba asayamung nung asaya liasü, ta AFP sangdong ka ajanga metetdaktüsü.

Protected rating angur parnok 14 rongnung Nadal-a densema lir aser ibayongji pa main event nung asayatsü maangka ngutetogo.

2013, 2017, aser 2019 küm US Open akokba den külemi Rafael Nadal-i 2010 küm iba asayamung nung Grand Slam ajakprongka khen khen koka liasü. 2022 küm iba asayamung nung round pezübuba tonga asayaba sülen pa Slam ana

nung dang asayar lir aser pa tanabuba round adena asayadanga mali.

Iba asayamung nung teburtem rongnung temaba jenjang nung alisang Italy nungur Jannik Sinner aser tetsürtem rongnungia temaba jenjang nung alila Iga Swiatek nata asayatsü asoshi züngoksema lir.

Maneni teburtem rongnung tanabuba nung alisang Novak Djokovic aser tetsürtem rongnungi Coco Gauff, shiba defending champions lir, tenata iba asayamung nung shilem agitsü.

French Open aser Wimbledon akokba sülen Spain nungur asayar Carlos Alcaraz ya Rafael Nadal sülen küm ka nung French Open aser Wimbledon den US Open akokba mezüngbuba asayar akümtsü ana nung lir.

Australian Open tesüsabuba koker alila Aryna Sabalenka aser Wimbledon champion Barbora Krejčíková nata iba asayamung atema züngoksemogo.

Yiruba ajanga masayai lir America tsür Reilly Opelka-a taküm mezüngbuba Grand Slam nung asayatsü lir.

Taküm iba asayamung nung shilem agitsü aliba taoba mapang US Open koker alirtem rongnung Sloane Stephens aser Emma Raducanu na aser Daniil Medvedev nung densema lir.

ICC T20I rankings: Suryakumar tanabuba jenjang nung lir

Chiteni/July 17, 2024 (Agencies): Bodhbarnü sayaba ICC T20I batting rankings nung India nungur batsman Suryakumar Yadav tanabuba jenjang nung lir aser India nungersa Yashasvi Jaiswal trokbuba tongtetogo.

Zimbabwe 4-1 agi akokba asaya sülen update asüba T20 batters' list nung Ruturaj Gaikwad jenjang ka asepzüka lua tibuba nung lir.

Zimbabwe den asayaba mapang run 141 yangluba sülen Jaiswal jenjang pezü tekjakdangi tua tang trokbuba nung lir. Batter tem rongnung Australia nungur asayar Travis Head temaba jenjang nung lir Suryakumar tanabuba nung lir.

Shubman Gill, shiba lenisüba nung India team iba asayamung nung asaya liasü, pai asaya pongu nung run 170 yanglua pai ajak dang run timba yanglu aser pa jenjang 36 tejakdangi tua tang 37buba nung lir.

T20I bowlers rankings top 10 nung India nungur asayar ka danga mali. Axar Patel shiba Zimbabwe den asaya nung masayadaktsüi anisüngzük agütsüogo pa 13buba nung lir.

Ajisüaka fast bowler Mukesh Kumar aser spinner Washington Sundar nata reprangtetsüsa tejakdangi tuogo.

Mukesh shibai asaya asem nung wicket ti agia liasü, pa jenjang 36 tejakdangi tua tang 46buba nung lir aser Washington shibai asaya pongu nung wicket ti agia liasü, pa-a jenjang 21 tejakdangi tua tang 73buba nung lir.

T20I bowlers' chart nung England nungur asayar Adil Rashid temaba jenjang nung lir aser pa sülen South Africa nungur asayar Anrich Nortje aser Sri Lanka nungur asayar Wanindu Hasaranga na lir.

T20I all-rounders' rankings nung India nungur asayar Hardik Pandya aser Axar na trokbuba aser 13bubai asepzüka luogo.

Washington aser Shivam Dube na jenjang ti aser 35 tejakdangi tua tang 41 aser 43buba nung lir.

All-rounders' list nung Australia nungur asayar Marcus Stoinis aser Zimbabwe nungur captain, Sikandar Raza na jakdang Sri Lanka nungur asayar Hasaranga maneni temaba jenjang nung lir.

BILEMDANGANG

"Liromedema alitsü atema pei pei sasa inyaktsüla."